

Otro luna

GRAN HAZAÑA DI KENNETH CROES

ORANJESTAD (AAN): E gran atleta Arubano, Kenneth Croes ta preparando pa un otro gran hazaña den luna di September di e aña aki.

Den un entrevista special cu DIARIO, Kenneth a muestra cu e proximo hazaña deportivo di duracion largo di dje lo ta e "Maraton de la Patrona del Mar". Cu e hazaña aki Kenneth ta spera di por promove Deporte den juventud buscando di e manera aki pa preveni e mal uso di droga y otro vicionan cu constantemente ta menaza tur hende.

Kenneth ta un gran atleta prepara na nivel mundial y a logra actividadnan deportivo sin precedente, destacando e.o. esun cu el a haci dia 7 di October 1990, ora cu hopi entusiasmo y dedicacion el a landa for di Aruba te na costa di Venezuela den 11 ora, cubriendo un distancia di 32 kilometer, regresando e mesun dia den un kayak den 7 ora y cubriendo un distancia di 47 kilometer.


E asina yama "Maraton de la Patrona del Mar" lo tuma lugar dia 15 di September y Kenneth lo intenta un hazaña nobo. E lo mester bay landa for di Chacopata (na e península Venezolano di Araya) rumbo pa Isla de Margarita (Punta Mosquito).

Ora e yega eynan e lo cuminsa rema den un kayak pa e beach "El Agua", unda e lo continua su aventura coriendo riba bicicleta, te ora e yega na Valle del Espiritu Santo.

Pa cera esaki cu Broche de Oro, Kenny lo sigui di eynan pa e Santuario de la Virgen del Valle y eynan e lo ofrece na Virgen un medalla cu a ser hiba Venezuela ora cu e atleta a cruza lama entre Aruba y Venezuela.

Riba e medalla ey tin un mensahe di juventud Arubano cu ta lucha constantemente contra e amenaza di droga y otro vicionan.

Durante e hazaña aki Kenneth lo ta acompaña pa un grupo di jovennan Arubiano y Venezolano, kendenan conhuntamente lo haci un peticion di fe y esperanza na la Virgen. Kenneth lo conta tambe cu un equipo profesional di respaldo cu lo guie y asistie durante e hazaña aki, entre cual tin e



director di e evento Kemel Barakat, e productor ta Raul Gomez, director tecnico ta Michael Croes, coordinador riba lama ta Cloude, coordinador riba tera ta Saleh Barakat, director di mediconan ta Dr. Ramon Navas, capitan di e flota ta Capt. Miguel Rodriguez, y asistentenan personal di e atleta ta Hassan Barakat y Jacobo Obadia. Entrenadora ta Maria Luisa Croes, y nutricionista ta Dr. Douglas Graham.

E flota cu lo compaña Kenneth riba lama ta consisti di 2 yate, 3 penero, 1 dingy, 1 speedboat, y 1 helicopter. Un grupo di experto ta preparando actualmente e ruta cu hopi pasenshi y dedicacion.

Segun DIARIO a compronde, e maraton aki lo atrae hopi atencion di e diferente medionan di comunicacion y esaki lo ta hopi importante pa por logra e obhetivonan poni pa promove deporte na juventud.

E atleta mes ta actualmente den un fase di preparacion pa e hazaña aki. Kenneth Croes mes lo sali Diabierna awor pa Canada, unda e lo ricibi entrenamiento na e campo Deer Hurst cu ta situa na e pueblo poco pobla di

Huntsville, cu ta keda 2 ora leu di Toronto.

E entrenamiento di e atleta lo ta concentra den hopi kilometer remando den kayak

y tambe preparacion di e.o. abdominalnan, hisamento di peso, landa, examen medico, masage, core bicicleta, y bon descanso.

Riba Diasabra 24 di Augustus e lo sali pa Florida unda e lo keda na Club Hygiene na Marathon (Florida). E ta situa na un ora y mey di Miami y ta pertenece na e famoso Dr. Douglas N. Graham y na e lugar aki nan no ta acepta mas di seis persona na mesun momento.

Akinan Kenneth Croes lo concentra hopi kilometrahe den landamento, bicicleta, core, rema, etc.

Diamars dia 10 di September Kenneth lo regresa Aruba den compania di Dr. Douglas Graham kende lo trece e alimento special pa e atleta por usa prome y durante e evento.

Diarazon 11 di September e lo sali pa Margarita acompaña pa Dr. Graham, Michael Croes, Maria Luisa Croes, y asistentenan Hassan Barakat y Jacobo Obadia.

E hazaña mes lo cuminsa pa 9'or di anochi Diasabra 14 di September y ta ser spera cu e lo yega pa 7:00 a.m. pa 9:00 a.m. e siguiente dia na Isla di Margarita.

Mas despues DIARIO lo trece informacionnan mas amplio di e gran hazaña aki di e Arubiano Kenneth Croes.